

## N A C R T

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine" broj: 49/06, 51/09) i članova 23. i 25. Statuta Općine Stari Grad Sarajevo – Prečišćeni tekst („Službene novine Kantona Sarajevo“, broj: 20/13), na sjednici održanoj dana \_\_\_\_\_, Općinsko vijeće Stari Grad Sarajevo, donosi

### **ODLUKU**

#### **O USLOVIMA I POSTUPKU STICANJA STATUSA UDRUŽENJA I FONDACIJA OD POSEBNOG ZNAČAJA ZA OPĆINU STARI GRAD SARAJEVO I PROJEKATA OD POSEBNOG ZNAČAJA ZA OPĆINU STARI GRAD SARAJEVO**

#### **I – OPĆE ODREDBE**

##### **Član 1.**

##### **(Predmet Odluke)**

Ovom Odlukom utvrđuju se uslovi i postupak sticanja statusa udruženja i fondacija (u daljem tekstu: neprofitnih organizacija) od posebnog značaja za Općinu Stari Grad Sarajevo (u daljem tekstu: Općina), kao i uslovi i postupak sticanja statusa projekata neprofitnih organizacija od posebnog značaja za Općinu.

##### **Član 2.**

##### **(Poseban značaj za Općinu)**

- (1) Status posebnog značaja za Općinu neprofitne organizacije stiču pod uslovima i postupkom utvrđenim ovom Odlukom, a čija djelatnost i rad doprinosi promociji Općine i realizaciji strateških ciljeva razvoja Općine, ali i očuvanja tradicije i sjećanja na posebne historijske događaje vezane za Općinu.
- (2) Status projekata od posebnog značaja za Općinu stiče se pod uslovima i postupkom utvrđenim ovom Odlukom, a čija realizacija doprinosi promociji Općine i realizaciji strateških ciljeva Općine, ali i očuvanja tradicije, sjećanja na događaje i ličnosti vezane za Općinu.

#### **II – USLOVI ZA STICANJE STATUSA UDRUŽENJA I FONDACIJA OD POSEBNOG ZNAČAJA ZA OPĆINU**

##### **Član 3.**

##### **(Uslovi za sticanje statusa od posebnog značaja za Općinu)**

Uslovi za sticanje statusa neprofitnih organizacija od posebnog značaja za Općinu shodno odredbama ove Odluke utvrđuju se kao:

- opći uslovi;
- posebni uslovi.

#### **Član 4.**

##### **(Opći uslovi)**

Neprofitne organizacije mogu biti proglašene od posebnog značaja za Općinu, ukoliko ispunjavaju sljedeće opće uslove:

- da su osnovane i registrovane u skladu sa relevantnim zakonskim i podzakonskim aktima;
- da su registrovane sa sjedištem na području Općine najmanje pet godina do dana prijave na Javni poziv;
- da aktivnosti i djelatnosti za koje su osnovane razvijaju i provode na području Općine Stari Grad Sarajevo;
- uredno finansijsko poslovanje.

#### **Član 5.**

##### **(Posebni uslovi)**

Neprofitne organizacije mogu biti proglašene od posebnog značaja za Općinu, ukoliko ispunjavaju pored općih uslova iz člana 4. ove Odluke i jedan od sljedećih posebnih uslova:

- da se radom i djelovanjem neprofitne organizacije doprinosi realizaciji ciljeva i prioriteta, koje je Općina odredila kroz relevantne strateške dokumente;
- da se radom i djelovanjem neprofitne organizacije doprinosi memoriji sjećanja na događaje, datume ili ličnosti koje su ostavile poseban pečat na Općinu i njene stanovnike;
- da se radom i djelovanjem neprofitne organizacije doprinosi zaštiti prava, zadovoljavanju zajedničkih interesa i rješavanju zajedničkih pitanja na području Općine za boračke kategorije;
- da se radom i djelovanjem neprofitne organizacije doprinosi jačanju i razvoju turizma na području Općine;
- da se radom i djelovanjem neprofitne organizacije doprinosi očuvanju, njegovanju kulture sjećanja i tradicije odbrambeno-oslobodilačkog rata 1992-1995. godine vezano za područje Općine, kao i odbrambeno-oslobodilačkog rata 1941-1945. godine vezano za područje Općine.

### **III – USLOVI ZA STICANJE STATUSA PROJEKTA OD POSEBNOG ZNAČAJA ZA OPĆINU**

#### **Član 6.**

##### **(Uslovi za sticanje statusa od posebnog značaja za Općinu)**

Uslovi za sticanje statusa projekta od posebnog značaja za Općinu shodno odredbama ove Odluke utvrđuju se kao:

- opći uslovi;

- posebni uslovi.

#### **Član 7.**

##### **(Opći uslovi)**

Projekti mogu biti proglašeni od posebnog značaja za Općinu, ukoliko ispunjavaju sljedeće opće uslove:

- da su neprofitne organizacije, koje predlažu projekte osnovane i registrovane u skladu sa relevantnim zakonskim i podzakonskim aktima;
- da su neprofitne organizacije, koje predlažu projekte, registrovane najmanje pet godina sa sjedištem na području Općine do dana objavljivanja Javnog poziva;
- da se aktivnosti i djelatnosti za koje su osnovane neprofitne organizacije, koje predlažu projekte, razvijaju i provode na području Općine Stari Grad Sarajevo;
- uredno finansijsko poslovanje neprofitnih organizacija, koje predlažu projekte;

#### **Član 8.**

##### **(Posebni uslovi)**

Projekti mogu biti proglašeni od posebnog značaja za Općinu, ukoliko ispunjavaju pored općih uslova iz člana 7. ove Odluke i jedan od sljedećih posebnih uslova:

- da se projektom doprinosi realizaciji ciljeva i prioriteta, koje je Općina odredila kroz relevantne strateške dokumente;
- da se projektom doprinosi memoriji sjećanja na događaje, datume ili ličnosti koje su ostavile poseban pečat na Općinu i njene stanovnike;
- da se projektom doprinosi zaštiti prava, zadovoljvanju zajedničkih interesa i rješavanju zajedničkih pitanja na području Općine za boračke kategorije;
- da se projektom doprinosi jačanju i razvoju turizma na području Općine;
- da se projektom doprinosi očuvanju, njegovanju kulture sjećanja i tradicije odbrambeno-oslobodilačkog rata 1992-1995. godine vezano za područje Općine, kao i odbrambeno-oslobodilačkog rata 1941-1945. godine vezano za područje Općine.

#### **IV – POSTUPAK STICANJA STATUSA POSEBNOG ZNAČAJA ZA OPĆINU**

##### **Član 9.**

##### **(Podnošenje zahtjeva za sticanje statusa neprofitne organizacije od značaja za Općinu)**

Neprofitna organizacija podnosi zahtjev za dobijanje statusa od posebnog značaja za Općinu Općinskom načelniku putem Službe za lokalni razvoj, uz obavezno dostavljanje sljedeće dokumentacije:

- Rješenje o registraciji;
- Uvjerenje o poreskoj registraciji – identifikacioni broj;
- Izvještaj o urednom finansijskom poslovanju (bilans stanja, bilans uspjeha i narativni izvještaj za prethodnu godinu);

- Dokaz da ispunjava najmanje jedan od posebnih uslova iz člana 5. ove Odluke.

#### **Član 10.**

##### **(Podnošenje zahtjeva za sticanje statusa projekta od značaja za Općinu)**

Neprofitna organizacija podnosi zahtjev za dobijanje statusa od posebnog značaja za Općinu za određeni projekat Općinskom načelniku putem Službe za lokalni razvoj, uz obavezno dostavljanje sljedeće dokumentacije:

- Opis projekta, koji sadrži ciljeve projekta, potrebna sredstva za realizaciju projekta i period trajanja projekta;
- Rješenje o registraciji;
- Uvjerenje o poreskoj registraciji – identifikacioni broj;
- Izvještaj o urednom finansijskom poslovanju (bilans stanja, bilans uspjeha i narativni izvještaj za prethodnu godinu);
- Dokaz da ispunjava najmanje jedan od posebnih uslova iz člana 8. ove Odluke.

#### **Član 11.**

##### **(Provjera ispunjenosti uslova)**

Po zaprimljenom zahtjevu iz člana 9. ili 10. ove Odluke, Služba za lokalni razvoj provjerava ispunjenost uslova utvrđenih ovom Odlukom, i dostavlja obrazložen prijedlog Općinskom načelniku vezano za podneseni zahtjev.

#### **Član 12.**

##### **(Prijedlog Općinskog načelnika)**

Općinski načelnik razmatra prijedlog iz člana 11. ove Odluke, te ukoliko isti ispunjava uslove utvrđene ovom Odlukom, predlaže Općinskom vijeću donošenje odluke o utvrđivanju statusa od posebnog značaja za Općinu.

#### **Član 13.**

##### **(Odluka Općinskog vijeća)**

- (1) Nakon što zaprimi prijedlog Općinskog načelnika iz člana 12. ove Odluke, Općinsko vijeće cijeni da li je prijedlog opravdan, te cijeni značaj neprofitne organizacije ili projekta, te donosi odluku o utvrđivanju neprofitne organizacije organizacijom od posebnog značaja za Općinu ili projekta od posebnog značaja za Općinu.
- (2) Odlukom kojom se utvrđuje neprofitna organizacija od posebnog značaja za Općinu utvrđuju se prava i obaveze neprofitne organizacije i Općine, uz poseban osvrt na pravo za finansiranje rada istih shodno odredbama ove Odluke.
- (3) Odlukom kojom se utvrđuje projekat od posebnog značaja za Općinu utvrđuju se prava i obaveze neprofitne organizacije, koja je predložila projekat, i Općine uz poseban osvrt na finansiranje ili sufinansiranje istog shodno odredbama ove Odluke.
- (4) Po osnovu odluka iz stavova (2) i (3) zaključuje se poseban ugovor o regulisanju međusobnih prava i obaveza.

## **V – FINANSIRANJE NEPROFITNIH ORGANIZACIJA I PROJEKATA OD POSEBNOG ZNAČAJA ZA OPĆINU**

### **Član 14.**

#### **(Finansiranje neprofitnih organizacija od posebnog značaja za Općinu)**

- (1) Neprofitne organizacije koje su shodno odredbama ove Odluke stekle svojstvo od posebnog značaja za Općinu imaju pravo na sufinansiranje rada u skladu sa raspoloživim sredstvima u Budžetu Općine, a što se detaljnije uređuje svake godine posebnim ugovorom, nakon usvajanja Budžeta.
- (2) Ugovor iz stava (1) ovog člana zaključuje se između neprofitne organizacije od posebnog značaja za Općinu i Općine koju zastupa Općinski načelnik.

### **Član 15.**

#### **(Finansiranje projekata od posebnog za Općinu)**

Projekti koji su shodno odredbama ove Odluke stekli svojstvo projekta od posebnog značaja za Općinu se finansiraju i sufinansiraju iz Budžeta Općine, što se detaljnije uređuje i odlukom iz člana 13. stav (3).

## **VI - PRAĆENJE REALIZACIJE PROJEKATA I UTROŠKA SREDSTAVA**

### **Član 16.**

#### **(Komisija za praćenje realizacije projekata od posebnog značaja za Općinu i pravdanje sredstava neprofitnih organizacija od posebnog značaja za Općinu)**

- (1) Komisija ili radno tijelo Općinskog vijeća Satri Grad Sarajevo iz oblasti rada neprofitne organizacije prati realizaciju projekata od posebnog značaja za Općinu i pravdanja sredstava neprofitnih organizacija od posebnog značaja za Općinu, na period od 12 (dvanaest) mjeseci.
- (2) Zadatak Komisije je da:
  - Kontinuirano prati realizaciju projekata od posebnog značaja za Općinu od potpisivanja ugovora iz člana 13. stav (4) ove Odluke;
  - Kontinuirano prati pravdanje finansijskih sredstava dodijeljenih po osnovu ugovora iz člana 13. stav (4) ove Odluke;
  - Prati pravdanje sredstava dodijeljenih neprofitnim organizacija od posebnog značaja za Općinu;
  - Dostavlja izvještaj Općinskom načelniku svakih šest mjeseci o praćenju realizacije projekata od posebnog značaja za Općinu, kao i pravdanja sredstava neprofitnih organizacija od posebnog značaja za Općinu;
  - Dostavi izvještaj Općinskom vijeću do 31.12. tekuće godine u kojem će biti detaljno navedeni rezultati praćenja projekata od posebnog značaja za Općinu, kao i koje neprofitne organizacije su opravdale dodijeljena sredstva za projekte od posebnog značaja za Općinu, a koje nisu, te koje neprofitne organizacije od interesa za Općinu su opravdale dodijeljena sredstva, a koje nisu.

## Član 17.

### (Pravdanje sredstava)

- (1) Dodijeljena sredstva shodno odredbama ove Odluke neprofitna organizacija od posebnog značaja za Općinu kao i neprofitna organizacija čiji je projekat proglašen projektom od posebnog značaja za Općinu obavezne su opravdati najkasnije u roku 12 (dvanaest) mjeseci od dana potpisivanja ugovora, kojim je definisana i visina dodijeljenih finansijskih sredstava.
- (2) Ukoliko neprofitne organizacije iz stava (1) ovog člana ne opravdaju finansijska sredstva u utvrđenom roku, obavezne su sredstva vratiti u roku od 30 (trideset) dana, u protivnom pokrenut će se sudski postupak za povrat dodijeljenih sredstava, a Općinski načelnik će na osnovu izvještaja Komisije, dostaviti prijedlog Općinskom vijeću za gubitak statusa neprofitne organizacije ili projekta od posebnog značaja za Općinu.
- (3) Na osnovu prijedloga iz stava (2) ovog člana Općinsko vijeće donosi odluku o gubitku statusa od posebnog značaja za Općinu neprofitne organizacije koja nije opravdala sredstva ili projekta za koji nisu opravdana sredstva dodijeljena iz Budžeta Općine.

## VII – PRELAZNE I ZAVRŠNE ODREDBE

### Član 18.

#### (Stupanje na snagu Odluke)

Ova Odluka stupa na snagu osmog dana od dana objavljivanja u Službenim novinama Kantona Sarajevo.

**PREDSJEDAVAJUĆI OPĆINSKOG VIJEĆA**

**STARI GRAD SARAJEVO**

**Seid Škaljić**

Broj:

Datum:

## OBRAZLOŽENJE

### I - PRAVNI OSNOV

Pravni osnov donošenja ove Odluke sadržan je u odredbama člana 13. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine" broj: 49/06, 51/09), kojima su utvrđene nadležnosti Općinskog vijeća, dok je članovima 23. i 25. Statuta Općine Stari Grad Sarajevo – Prečišćeni tekst („Službene novine Kantona Sarajevo“, broj: 20/13), utvrđeno da je za donošenje propisa i akata u okviru prava i dužnosti Općine nadležno Općinsko vijeće.

### II - RAZLOZI DONOŠENJA

Uvažavajući da udruženja i fondacije, veoma često, kroz svoj rad i djelovanje targetiraju oblasti društvene zajednice koje su bitne za rast, razvoj i unaprjeđenje lokalne zajednice, smatra se opravdanim pojedine fondacije i udruženja proglasiti fondacijama i udruženjima od posebnog značaja za Općinu.

Odredbama predložene odluke se definiraju opći i posebni uslovi za proglašenje fondacija i udruženja od posebnog značaja za Općinu, a sve u cilju unapređenja uslova života stanovništva lokalne zajednice, ali i očuvanja memorije sjećanja za bitne događaje za Općinu, ali i njene stanovnike.

Nadalje, pojedine fondacije i udruženja ne ispunjavaju uslove da steknu status od posebnog značaja za Općinu, međutim u okviru svog rada i djelatnosti mogu ponuditi projekat koji može biti od posebnog značaja za Općinu ukoliko se kroz implementaciju istih može pružiti pomoć lokalnoj zajednici u rješavanju određenih specifičnih potreba ili izazova u Općini. Također, značajni su i projekti kojima se utiče na realizaciju strateških ciljeva Općine ili očuvanje memorije sjećanja na značajne događaje, ličnosti ili datume u historiji Općine.

### III – OBRAZLOŽENJE

Odlukom je predviđeno sedam poglavlja, na način kako slijedi:

I - Opće odredbe;

II - Uslovi za sticanje statusa udruženja i fondacija od posebnog značaja za Općinu

III - Uslovi za sricanje statusa projekta od posebnog značaja za Općinu

IV - Postupak sticanja statusa posebnog značaja za Općinu

V - Finansiranje neprofitnih orgaizacija i projekata od posebnog značaja za Općinu

VI - Praćenje realizacije projekata i utroška sredstava

VII - Prelazne i završne odredbe

#### **IV - FINANSIJSKA SREDSTVA**

Za provođenje procedure usvajanja ove Odluke nisu potrebna finansijska sredstava dok su za realizaciju iste potrebna finansijska sredstva koja je potrebno predvidjeti u Budžetu Općine.

Predlagač

Općinski načelnik putem

Službe kabineta Općinskog načelnika